

nem similem fieri positioni antecedentis. Id autem nequaquam accidere, nisi locus sequens traducatur ad semicirculum, in quo statuebatur locus antecedens, quod & Hali expositor eius confirmat. Verum duo modi eius cum exemplis à computatione directoria, qua memoratus Parmensis, ac penè omnes alij vtuntur, non discrepant. Quid igitur de tam prudenti, quàm eruditissimo viro sentiemus? Nunquid tantum philosophum repugnantes asseruisse sententias impunè suspicabimur? Credo equidem Ptolemæum & seriò tradidisse fundamentum artis per semicirculos huiusmodi, & modum numerandi apprimè calluisse, quamuis difficilem, adeò vt perplexum potius redderet auditorem quàm doctum. Satius ergo putans, propè verum versari, quàm veritatem ipsam radicibus quærendo desperare, supputationes quasdam breues veritati propinquas exposuit. Quod haud quaquam mirum videri debet, cum & nostra ætate Ragusinus ille Ioannes Gazulus tametsi Ptolemæi eruditissimi, Gebuq; acutissimi, ac aliorum plurimorum doctrinas acceperit, nullam tamen prorsus numerandi facilitatem in directionibus ac æquandis domibus aduexit: quinimo turbam maximam multitudine argumentationum concitauit. Quantum itaq; difficultatis in hoc existit negotio, satis liquet. Quid autem commodi nanciscemur, si generalis quædam artis directoriæ promptitudo nobis illata fuerit, ex libris Iudicum abunde colligetur, vbi tempora futurorum accidentium omnium per directiones potissimum inuestigari solent. Tantam igitur vtilitatem præsul dignissime directionum tabulæ afferent, quas petebas, in quacunque regione latitudinem 60. graduum non excedente, siue significator dirigendus in itinere solari existat, siue ab eo versus alterum polorum secedat, in quibus maximam Solis ab Æquatore suppositi declinationem trium & viginti graduum cum dimidiò, obseruationibus modernis maiorem non admittentibus. In omni demum regione duodecim cæli domicilia constituere, ac in eis stellas distribuere, aliaq; plurima scitu iucundissima per hasce tabulas addiscere licebit. Eas itaq; primitias operum meorum suscipere digneris, quas vbi pro acumine ingenij tui probaueris, in publicum prodire iubeto. Vale præsulum decus.